



JAFNRÆÐI • JÁKVÆÐNI
TRAUST • VIRÐING

Pistill sveitarstjóra

Helgi Héðinsson

Skútustaðahreppur

12. maí

Kæru sveitungar um heim allan. Það er mikill kraftur í samfélaginu þessa dagana og við horfum með bjartsýni til komandi sumars. Kosningar á næsta leyti og lömbin farin að gægjast í heiminn. Þessi pistill er minn síðasti að sinni, en ég kveð nú þetta hlutverk með bros á vör og stoltur af þeim árangri sem við höfum náð sem samfélag.

Anna Sigríður ráðin í afleysingu skólastjóra



Anna Sigríður Sveinbjörnsdóttir

Anna Sigríður Sveinbjörnsdóttir hefur verið ráðin í afleysingu leik- og grunnskólastjóra við Reykjahlíðarskóla og Leikskólann YI fyrir næsta skólaár. Anna er með BS gráðu í alþjóðlegri umhverfis- og þróunarfræði frá Noregs miljø- og biovetniskapelige universitet, MA gráðu í sérkennslufræðum frá University of Oslo og er að ljúka

Diplómagráðu í áfallastjórnun frá Háskólanum á Bifröst. Anna hefur töluverða reynslu af kennslu og við ráðgjöf í velferðarmálum. Við bjóðum Önnu velkomna og hlökkum til samstarfsins.

Uppbygging íbúðarhúsnæðis

Sveitarstjóri undirritaði í vikunni fyrir hönd sveitarfélagsins samstarfsyfirlýsingu um uppbyggingu íbúðarhúsnæðis í sveitarfélaginu þar sem Jarðböðin hf. og Skútustaðahreppur lýsa yfir vilja til samstarfs.



Helgi Héðinsson og Guðmundur Þór Birgisson

Jarðböðin kynntu nýverið metnaðarfull uppbyggingaráform. Áformin munu skapa fjölda nýrra starfa og í því ljósi er það vilji Jarðbaðanna að tryggja starfsfólki sínu húsnæði. Að sama skapi er það vilji sveitarfélagsins að styðja við öflugt atvinnulíf og mannlíf á svæðinu og fjölga íbúum til að styrkja stoðir samfélagsins. Í því ljósi er íbúðarhúsnæði lykilatriði. Samstarfið við Jarðböðin er mikilvægur hlekkur í stærra verkefni þar sem leitast verður við að byggja til að mæta þörfum íbúa, eldra fólks og fyrirtækja á svæðinu ásamt uppbyggingu leiguhúsnæðis í samstarfi við Húsnæðis- og mannvirkjastofnun.

Útfærsla verkefnisins og samstarf verður mótað nánar á komandi vikum.

Sveitarstjórnarkosningar 14. maí 2022

Á fundir sveitarstjórnar var lögð fram auglýsing frá yfirkjörstjórn vegna kosninga til sveitarstjórnar sameinaðs sveitarfélags Skútustaðahrepps og Þingeyjarsveitar, sem fram fara þann 14. maí 2022. Kjörstaðir við sveitarstjórnarkosningarnar þann 14. maí nk. eru tveir og verða á kjördag opnir sem hér segir:

Ljósveitingabúð frá kl. 10:00 til kl. 22:00
Skjólbrekka frá kl. 10:00 til kl. 22:00

Í undirkjörstjórn á kjörstað í Ljósveitingabúð eru: Steinn Jóhann Jónsson, Katla Valdís Ólafsdóttir og Helga Sveinbjörnsdóttir. Varamenn: Snorri Guðjón Sigurðsson, Aðalsteinn Már Þorsteinsson og Hanna Berglind Jónsdóttir. Í undirkjörstjórn á kjörstað í Skjólbrekku eru: Birgir Steingrímsson, Bernadetta Kozaczek og Helgi Arnar Alfreðsson. Varamenn eru: Atli Steinn Sveinbjörnsson, Sigríður Jóhannesdóttir og Hannes Lárus Hjálmarsson. Kjörskrá vegna kosninganna er skipt á milli sveitarfélaganna og ofangreindra tveggja kjörstaða. Kjósandi sem óskar eftir því að flytja sig á milli kjörstaða getur fengið heimild til þess flutnings enda fylli hann út eyðublað þar að lútandi. Á kjördag, meðan atkvæðagreiðsla stendur yfir, mun yfirkjörstjórn hafa aðsetur sitt í Félagsheimilinu Breiðumýri. Sími yfirkjörstjórnar á kjördag er 864 2938 og tölvupóstfangið: kjorstjorn@thingeyjarsveit.is. Talning atkvæða fer fram í Breiðumýri og hefst að kjörfundi loknum. Útsendingu frá talningarstað verður streymt á vefnum. Slóð á netstreymi verður auglýst á vef beggja sveitarfélaga. Yfirkjörstjórn vegna kosninga til sveitarstjórnar sameinaðs sveitarfélags Skútustaðahrepps og Þingeyjarsveitar, 3. maí 2022. Dagný Pétursdóttir, Jón Þórólfsson, Tryggvi Þórhallsson

Jákvæðar horfur eftir Covid

Á fundi sveitarstjórnar í vikunni var lagt fram rekstraryfirlit janúar - mars 2022. Skatttekjur fyrstu þrjá mánuði ársins eru umtalsvert hærrí en árið 2021 og nema 129,8 milljónum fyrstu 3 mánuði ársins, í samanburði við 113,2 milljónir árið 2021. Bráðabirgðarekstrarniðurstaða A-hluta er neikvæð um 9,2 milljónir, í samanburði við 26 milljóna neikvæða rekstrarniðurstöðu fyrstu þrjá mánuði ársins 2021 og 9,5 milljóna neikvæða rekstrarniðurstöðu ársins 2020.

Skatttekjur fyrstu fjóra mánuði ársins 2022 eru 166 milljónir, sem er ríflega 21% hærrí skatttekjur en á árinu 2021. Auknar skatttekjur fyrstu mánuði ársins skýrast af þremur ástæðum, íbúabróun, launahækkunum og góðu atvinnuástandi. Þann 1.maí 2022 voru íbúar Skútustaðahrepps 490, sem er um 7% fleiri íbúar en á sama tíma árið 2021. Í febrúar 2022 námu meðallaunagreiðslur í Skútustaðahreppi 661 þúsund krónum en í febrúar 2021 voru meðallaunagreiðslur 595 þúsund krónur. Í febrúar 2022 voru 25 íbúar Skútustaðahrepps skráðir atvinnulausir, en í febrúar 2021 voru þeir 72.

Bambahús og gróðurkassar

Komið hefur verið fyrir Bambahúsi við Reykjavíðarskóla þar sem starfsfólk og nemendur koma til með að rækta og hlúa að hinum ýmsu matjurtum en bambahúsið inniheldur 1000 lítra IBC tank sem kallast bambar. Notkun gróðurhússins stuðlar að eflingu hringrásarhagkerfisins þar sem endurnýttar eru vökvaumbúðir sem annars væru fluttar úr landi og urðaðar. Tilgangur hússins er að kenna nemendum sjálfbærni og ræktum og hvernig er hægt að minnka kolefnisspor.

Einnig hefur gróðurkössum verið komið fyrir á skólalóðinni en nemendur smíðuðu og skreyttu þá sjálfir í vetur. Þar mun fara fram moltugerð þar sem afgangsgrænmeti og ávextir eru nýttir í moltuna og stendur svo til að rækta gulrætur, grasker og ávextir í sumar svo eitthvað sé nefnt.





Nánari upplýsingar veitir Hjördís Albertsdóttir, skólastjóri í s. 464-4376 eða hjordis@reykjahlidarskoli.is

Staða fráveitumála

Svartvatnstankur á Hólasandi hefur verið tekinn til notkunar. Stefnt er að formlegri opnun hans í lok maí, en framkvæmdin við svartvatnstankinn hefur verið eitt lykilverkefna í umhverfismálum Mývatnssveitar.

Fýsileikagreining orkukosta

Verkátun varðandi uppsetningu varmadæla er í vinnslu og er stefnt að uppsetningu þeirra síðsumars. Verkefnið gegnir lykilhlutverki í að jafna húshitunarkostnað og fría raforku sem í dag er nýtt til húshitunar. Miðað við stöðu verkefnisins núna munu á milli 10-15 húseigendur í Mývatnssveit setja upp varmadælur við hús sín á árinu 2022.

Lausar stöður við Reykjahlíðarskóla



Lausar stöður til umsóknar frá 1. ágúst 2022:

- Smíðakennari (20%)
- Umsjónarkennari í unglingsdeild (100%), með kennslu í stærðfræði og raungreinum
- Stuðningsfulltrúi (90-100%)
- Aðstoð í eldhúsi (60 – 70%)

Göngu- og hjólastígur

Gengið hefur verið frá verksamningi við Jón Inga Hinriksson ehf. um lagningu göngu- og hjólastígs við Mývatn. Samningurinn er í samræmi við tilboð verktakans, sem nam 76,6% af kostnaðaráætlun. Lagning göngu- og hjólastígs er samvinnuverkefni Skútustaðahrepps og Vegagerðarinnar og eru 70% kostnaðar greidd úr sérstökum sjóði innan Vegagerðarinnar, sem hefur að markmiði að byggja upp göngu- og hjólastíga um allt land. Sveitarstjórn Skútustaðahrepps þakkar Vegagerðinni kærlega fyrir gott samstarf í þessu mikilvæga verkefni, sem bæta mun umferðaröryggi og auka lífsgæði í sameinuðu sveitarfélagi.



Jón Ingi Hinriksson og Helgi Héðinsson

Aðalfundur Mývatnsstofu

Aðalfundur Mývatnsstofu var haldinn á dögnum. Sveitarstjóri sótti fundinn fyrir hönd sveitarfélagsins. Mikil jákvæðni og bjartsýni ríkir með komandi sumari eftir krefjandi áskoranir síðustu tvö ár.



Hrós dagsins

Hrós dagsins er heldur óvanalegt, en í ljósi þess að senn líkur kjörtímabilinu þá vil ég skila kærum þökkum og hrósi fyrir frábær störf í þágu samfélagsins á forvera mína tvo í starfi þá Þorstein Gunnarsson og Svein Margeirsson. Við búum sannarlega að störfum þeirra beggja á kjörtímabilinu. Þorsteinn er gríðarlegur fagmaður í stjórnsýslu og mjög öflugur í að móta og koma í framkvæmd ýmsum verkefnum. Sveinn kom hér inn í samfélagið eins og ferskur andvari og hefur unnið gríðarlega mikilvægt starf í þágu samfélagsins við krefjandi Covid aðstæður. Sveinn er snillingur í að virkja kraft fólksins og við eigum eftir að uppskera enn frekar á komandi árum á þeim grunni sem Sveinn lagði.

Þorsteinn er nú borgaritari Reykjavíkurborgar, en Sveinn mun á næstu vikum hefja störf af fullum þunga sem framkvæmdastjóri nýsköpunar- og loftslagsmála hjá Brim. Það hefur verið lærdómsríkt og ómetanlegt að starfa með Þorsteini og Sveini og þeir eru vel að hrósi dagsins komnir.

Helgi Héðinsson, sveitarstjóri